

氏族典第三卷

曹姓部

金 曹勇義

按金史虞仲文傳曹勇義廣寧人第進士除長春令樞府辟令史上書陳時政累擢館閣遷樞密副都承旨權燕京三司使加給事中召爲樞密副使加太子少保與虞仲文同在樞密羣小擠之復出爲三司使加宣政殿大學士卒諡文莊天會七年贈守太保正隆三年改贈特進定國公

曹望之

按金史曹望之傳望之字景蕭其先臨潢人遼季移家宣德天會間以秀民子選充女直字學生年十四業成除西京教授爲元帥府書令史補正令史轉行臺省令史錄教授資補修武校尉除右司都事改行臺吏部員外郎海陵爲相嘗以書致其私望之不從天德元年調同知石州軍州事坐事免久之除絳陽軍節度副使入爲戶部員外郎進本部郎中特賜進士及第大定初討窩斡望之主軍食以勞進一階兼同修國史三年詔遣分道勸農廉問職官臧否還遷本部侍郎領覆實繕修大

內財用復以勞進階家奴袁一言涉妖妄除名頃之出望之德州防禦使改同知西京留守事上書
論便宜事多見采納以本官行六部事于北邊召拜戶部尙書終年五十六望之初不學及貴刻苦
自致有詩集三十卷

曹珪

按金史曹珪傳珪徐州人大定四年州人江志作亂珪子弼在賊黨中珪謀誅志并弼殺之尙書省
議當補二官雜班叙詔曰珪赤心爲國大義滅親自古罕聞也法雖如是然未足以當其功更進一
官正班用之

曹仙

按魚臺縣志仙於金大定十七年任宿州絳縣主簿累立戰功陞授永城縣尹居官以平直稱

曹淵

按金史曹望

之子淵爲奉御

曹澤

按金史曹望之傳望之子澤爲筆硯承奉

元 曹政

按魚臺縣志政卽子爲人勇幹有才辨以保義副尉從攻滕州遷敦武校尉從皇太弟忽必烈攻五河等邑擢單州招撫副使改魚臺縣行軍彈壓從攻襄陽斬黃光泚遷河南路招官民攻壽州攝濟兗單州行軍千戶還屯宿州陞濟寧州等處行軍都彈壓至元四年樞密院錄資望授魚臺縣諸軍民長官一邑軍聽治焉

曹興

按魚臺縣志興政子爲人魁岸倜儻善騎射弱冠代父從征以材武稱嚴實爲東平行臺時選置帳前拔突軍以攻襄陽鄂州功授東平路行軍都鎮撫充本軍彈壓李璫據濟南叛從攻拔之遷拔突彈壓至元十三年從中書右丞相伯顏南征東創復戰下常州陞千夫長令別統新附軍五百人以旌其功江南平入補宿衛復北戍度沙磧數千里積南北功授勅牒賜銅印忠顯校尉衛軍總管引見閣視材藝大加優賞賜銀符校尉俾隸前衛居則宿衛出則扈從如古朝門羽林郎將之職銀符

古今圖書集成
朱紱甚榮寵焉至元二十一年告歸

曹珏

按萬姓統譜珏字子玉資重篤實徙居方城二十年以教授爲業方城人有倉卒避吏留一篋而去年餘事定其人復來取驗篋封識不動正大末以文行徵復居襄溪號蹢蹢老人

曹元用

按元史曹元用傳元用字子貞世居阿城後徙汶上祖義不仕父宗輔德清縣主簿元用資稟俊爽幼嗜書一經目輒成誦始以鎮江路儒學正考滿游京師翰林承旨閻復薦爲翰林國史院編修官御史臺辟爲掾史元用初不習吏事而見事明決吏反師之轉中書省右司掾除應奉翰林文字遷禮部主事改尙書省右司都事轉員外郎及尙書省罷退居任城久之齊魯間從學者甚衆延祐六年授太常禮儀監經歷授翰林待制陞直學士泰定二年授太子贊善轉禮部尙書兼經筵官三年拜中奉大夫翰林學士兼經筵官預修仁宗英宗兩朝實錄天曆二年代祀曲阜孔子廟贈正奉大夫江渚等處行中書省參知政事護軍追封東平郡公諡文獻詩文四十卷號超然集二子偉

儀

曹伯啟

按元史曹伯啟傳伯啟字士開濟寧碭山人弱冠從東平李謙游篤於問學至元中歷仕爲蘭溪主簿累遷常州路推官河南省都事台州路治中御史潘昂霄廉訪使王俱交薦擢拜西臺御史改都事延祐元年陞內臺都事遷刑部侍郎出爲眞定路總管治尙寬簡民甚安之延祐五年遷司農丞奉旨至江浙議鹽法拜南臺治書侍御史俄去位英宗立召拜山北廉訪使俄拜集賢學士御史臺侍御史除浙西廉訪使不果行泰定初引年北歸伯啟性莊肅奉身清約在中臺所獎借名士尤多天曆中起爲淮東廉訪使陝西諸道行御史臺中丞使驛敦遣伯啟終不起至順三年長子震亨卒于毗陵伯啟往拊之明年二月卒于毗陵年七十九

曹鑑

按元史曹鑑傳鑑字克明宛平人穎悟過人旣冠南遊具通五經大義大德五年用翰林侍讀學士郝彬薦爲鎮江淮海書院山長十一年南行臺中丞廉恆辟爲掾史丁內艱起除興文署至治二年

授江浙行省左右司員外郎泰定七年遷湖廣行省左右司員外郎湖北廉訪司舉鑑宜居風紀不報天曆元年調江浙財賦府副總管元統二年陞同僉太常禮儀院至元元年以中大夫陞禮部尚書俄卒追封譙郡侯諡文穆鑑爲詩賦尙騷雅作文法西漢藏于家任湖廣員外時有故掾顧淵伯以辰沙一包饋鑑鑑漫置篋笥中後因欲合藥劑取視之乃有黃金三兩雜其中淵伯已歿鑑呼其子歸之其廉慎不欺如此

曹彥可

按元史顏瑜傳曹彥可者亳州人會妖寇起里中多田野無賴子目不知書者旣破毫揭帛于竿皆羣趨彥可家劫之使寫旗彥可力辭乃迫以刀斧彥可唾之曰我儒者知有君父寧死耳豈爲汝寫旗者耶賊怒遂見害年七十事聞給貲以葬賜諡節愍

曹文炳 曹文晦

按浙江通志文炳字君煥號霞間老人篤學沉潛不事表暴以儒學訓導薦不就著有霞間稿弟文晦字伯輝穎悟多識而雅尙瀟灑間以吟咏陶情致聘不赴號新山道人

明 曹良臣

按明外史曹良臣，良臣安豐人。潁寇旁掠聚鄉里，築堡自固。歸太祖於應天，爲江淮行省參政。進行省左丞，北取元都路地，至澤潞，進山西行省平章，還守通州。洪武三年，封宣寧侯。明年，從伐蜀克歸州，進克重慶。明年，從副將軍文忠北征，進至土刺河，哈刺章渡河拒戰，少却，追至阿魯渾河，敵騎大集，將士皆殊死戰，敵大敗走。而良臣遂沒於軍事，聞贈安國公，諡忠壯。

曹震

按明外史藍玉傳：曹震，濠人。從太祖起兵，累功，指揮使，封景川侯。從藍玉征雲南，平之。洪武二十一年，命理四川軍務。震在蜀久，諸所規畫並極周詳。蜀人德之。藍玉敗，謂與震及朱壽誘指揮莊成等謀不軌，論黨逆，以震爲首，並其子炳誅之。

曹興

按明外史藍玉傳：曹興，一名興才，未詳何許人。從平武昌，授指揮僉事。取平江，進指揮使。平中原，進都督僉事。洪武十一年，從藍玉討洮州羌降朶甘，曾擒三副使等師還，封懷遠侯。世襲指揮使，理軍。

務山西從北征有功後數年坐黨死

曹孔章

按萬姓統譜孔章字子文父伯淵字子澄有至行仕元爲武康教諭孔章少聰慧五經百氏子史無不究覽洪武初以明經薦爲烏程縣學教諭遷湖州府學教授聘典江西文衡學者多宗之時文簡古

曹銘

按陝西通志銘會寧人洪武中登進士第任兵科給事中才名顯著進都察院左僉都御史

曹銘

按萬姓統譜銘新野人以進士授香河知縣上疏言宋儒胡瑗等八人皆有功道學當從祀孔子廟允行之尋陞儋州知州卒祀鄉賢祠

曹庭訓

按萬姓統譜庭訓靈寶人性資聰敏處事果決鄉里曲直悉求判正洪武間以人才薦授應天府尹

曹體仁

按萬姓統譜體仁洪武間東平知州廉慎公平教民以禮讓撫字有方嘗有詩曰三年短髮愛民白一寸忠心爲國丹去後民猶思之

曹鶴

按山西通志鶴字九臯潞州人洪武間舉賢良方正官至左都御史才品重于時

曹本

按滕縣志本字子善漢河內守曹褒之後也本大父曹士安父曹思明皆有隱德思明夢數人以車載置篋至門開篋取人支體與之曰此隸人支體也思明受之一人後至謂其人曰曹某當一侍郎兒汝何以隸體與之其人大驚曰吾忘之然侍郎皆已散盡奈何後至者顧視篋中良久曰此不一侍郎鼻耶遂復與之本生而穎異志操不羣以貢游太學洪武間授大同蔚州判官以憂歸服除改北平布政司都事從成祖轉戰山東再出河北長驅金陵本城守有功焉積功歷廣西按察使所至有聲洪熙元年陞兵部侍郎歷事仁宗宣宗後左遷山西叅政卒

曹德

按山西通志德懷仁人由燕山左護軍總旗從靖難攻城破敵率勇銳前奮以一當百累陞中軍都督同知守德州爲人謹實御下不苛

曹睦

按浙江通志睦字肅賓瑞安人叔遠族孫永樂甲申進士選翰林院庶吉士時文皇擇親王輔導授睦秦府伴讀日以勸講輔德爲職會李海誣王不軌睦上疏力辨其非以憂歸服除赴闕疏諫征交趾上嘉納復補秦府紀善先後任秦邸三十年歷事四王初終一節人謂有董賈風焉

曹端

按明外史曹端傳端字正夫渥池人永樂六年舉人專心性理其學務躬行實踐而以靜存爲要事父母至孝繼遭二親喪五味不入口既葬廬墓六年爲霍州學正修明聖學諸生服從其教郡人皆化之遭艱歸服闋改蒲州學正霍蒲兩州各上章爭之霍奏先得請先後在霍十六載宣德九年卒官年五十九二子瑜琛亦廬端墓相繼死

曹益

按范縣志益永樂己丑貢任監察御史時太宗有事北方益屢勸修文德以綏懷之皆納其奏有言兵者益闢曰方今太平有象何苦貪邊功也時論是之後以病告歸宣德初卒于家

曹弘

按萬姓統譜弘字文淵益陽人永樂乙未進士歷刑部員外郎恭慎潔清詳讞明允累遷刑部右侍郎巡撫淮南鎮靜不擾軍民懷之卒于官篋中無長物惟衣二襲帶二束而已

曹義

按句容縣志義字子宜永樂中登進士授翰林院編修陞禮部主事改吏部歷員外郎中左右侍郎南京吏部尙書寇犯京師勅守崇文門天順初乞骸骨歸卒諡祭二壇有默菴集

曹鼐

按明外史曹鼐傳鼐字萬鍾寧晉人少伉爽有大志事繼母以孝聞由鄉舉宣德初授代州訓導願授別職改泰和縣典史七年督工匠至京師疏乞入試復中順天鄉試明年舉進士一甲第一入翰

林爲修撰英宗卽位充經筵講官宣宗實錄成進侍講五年入直文淵閣參預機務羣爲人內剛外和通達政體進翰林學士吏部左侍郎也先入寇王振挾帝親征次土木寇大集帝突圍不得出擁以去羣等俱及于難景帝立贈少傅吏部尙書文淵閣大學士諡文襄官其子恩大理評事英宗復位加贈太傅改諡文忠復官其孫榮錦衣百戶羣弟鼎由進士歷吏科都給事中

曹義

按明外史孫鏜傳曹義字敬方儀真人襲職爲燕山左衛指揮僉事累功至都督僉事充遼東副總兵代巫凱爲總兵官廉介有守遼人安之正統九年進都督同知十二年進右都督十四年進左都督義守遼垂二十年無大功英宗推恩特封豐潤伯居四年卒贈侯諡莊武繼室李氏殉詔旌之孫振嗣坐居喪納妓下詔獄革冠帶踰年復之成化中坐與僧妓飲下獄停祿一年卒子愷嗣弘治中總兵貴州賊貢米魯叛被劾罷還久之卒傳子棟及松嘗協守南京改鎮兩廣

曹凱

按明外史曹凱傳凱字宗元益都人正統十年進士授刑科給事中羣落多壯節英宗北征諫甚力

帝不從乘輿果陷凱慟哭竟日聲徹禁庭景泰中遷左給事中用薦擢浙江右叅政在浙數年聲甚著初凱爲給事嘗劾武清侯石亨亨得志修前憾遂謫凱衛經歷卒

曹吉祥

按明外史曹吉祥傳吉祥灤州人素依王振正統初征麓川爲監軍景泰中分掌京營後與石亨結率兵迎英宗復位遷司禮太監總督三大營嗣子欽從子鉉鐸鏐等皆官都督欽尋進昭武伯門下廝養乞恩冒濫者無虛日多至千百人朝士亦有依附希進者其權勢與石亨埒時並稱曹石未幾二人爭寵有隙御史楊瑄張鵬劾之吉祥乃復與亨合乘間懇帝帝爲下瑄等詔獄吉祥勢焰益張朝野仄目然帝英察見其所爲多私意稍稍疑及李賢力言奪門非是帝始大悟疎吉祥無何石亨敗吉祥內不自安乃日犒諸達官金錢穀帛諸達官皆願盡力效死欽問客馮益曰自古有宦官子弟可爲天子乎益曰君家魏武其人也欽因爲反謀天順五年七月欽私掠家人曹福來爲言官所劾帝令錦衣指揮遂杲察之急而降勅徧諭羣臣欽驚謀遂決是時甘涼告警帝令懷靈侯孫鏜西征未發吉祥使其黨掌欽天監太常少卿湯序擇是月庚子昧爽欽擁兵入而已以禁兵應之謀定

欽召諸達官夜飲時鏜及恭順侯吳瑾俱宿朝房達官馬亮恐事敗逸出走告瑾瑾趣鏜由長安右門隙投疏入帝急熟吉祥於內而勅皇城及京城九門閉弗啟欽知亮逸中夜馳往遂杲家殺杲使甲士殺都御史寇深于西朝房斫傷李賢於東朝房遂攻東西長安門鏜遣二子急召西征軍擊欽於東長安門欽走攻東安門及天漸曙欽黨稍稍散去鏜勒兵逐欽斬鉉鏞鏜子軌斫欽中膊欽乃走突安定諸門門盡閉竄歸家拒戰會大雨如注鏜督軍大呼入欽投井死遂殺鐸盡屠吉祥家越三日磔吉祥於市湯序馮益及吉祥姻婭達官皆伏誅

曹欽

按名山藏勲封記昭武伯曹欽天順元年以太監吉祥從子從奪門功得封五年坐反伏誅

曹英

按陝西通志英字文華臨洮衛人成化初進士任湖廣道監察御史巡按四川歲大荒有趙鐸者嘯聚爲盜英摘首惡寘大辟餘赦之悉令解散歸業以言事忤旨左遷湖廣邵陽縣知縣二年引疾致仕所著有遺興集恆濟寶錄默翁集三友主人傳

曹元

按明外史劉宇傳曹元字以貞大寧前衛人柔佞滑稽不修士行成化十一年進士授工部主事歷員外郎郎中與劉瑾相結正德二年屢遷右副都御史巡撫甘肅改撫陝西踰年召爲兵部右侍郎轉左尋代宇爲尙書兼督團營加太子少保將校遷除皆惟瑾命元所入亦不貲五年拜吏部尙書兼文淵閣大學士入閣輔政元瑣瑣無能在閣中日飲酒諧謔道里巷鄙語而已瑾敗元卽日上疏請罪辭極哀詔許致仕言官交劾黜爲民病卒無子

曹璘

按明外史曹璘傳璘字廷暉襄陽人成化十四年進士授行人久之選授御史孝宗嗣位疏言梓宮發引陛下宜衰絰杖履送至大明門外拜哭而別率中官行三年喪貴妃萬氏有罪宜告於先帝削其諡還葬他所帝納其奏頃之請復先朝言事謫官放遣宮中怨女罷撤監督京營及鎮守四方太監疏奏帝頗采焉弘治元年出按廣東引疾歸居山中讀書三十年不入城市

曹鳳

按河南通志鳳字鳴岐新蔡人成化中登進士第授祁門知縣累陞蘇州知府居數年政平訟理累擢副都御史巡撫延綏正德初召還佐理院事以忤逆瑾矯旨罷其官憤恨卒

曹鏐

按吳江縣志鏐字良金弘治六年進士選庶吉士十四年改刑部主事卹刑四川進員外郎性鯁介遇中貴人折辱之左遷東昌府通判時鎮守太監在臨清者尤暴橫鏐抗章劾其罪狀乞詔裁革武宗從之劉瑾怒使人刺鏐陰事無所得遷興化府同知都同劉全瑾族也恃勢不法鏐舉按其罪擢湖廣僉事歸於所居積土爲山植桐其上自號桐丘嘉靖中卒

曹雄

按明外史仇越傳曹雄西安左衛人弘治末歷官都指揮僉事爲延綏副總兵武宗卽位用總督楊一清薦擢署都督僉事充總兵官鎮固原以劉瑾同鄉自附于瑾瑾欲廣樹黨日相親重正德四年進署都督同知總督才寬禦寇沙窩爲所殺雄擁兵不救伴引罪乞解兵柄令子謐齎奏詣京師瑾異謐貌妻以從女而優詔褒雄令居職如故實鐸反寧夏雄聞變卽統兵壓境事定瑾以平賊功歸